

Participaziun dalla giuventetgna en Surselva

La gievgia vargada ha Il Giuven Center Surselva envidau la giuventetgna ed interessai dalla regiun ad ina discussiun davart la «participaziun dalla giuventetgna en Surselva». L'impurtonza dil tema ed il program variont ha carmalau numerusas visitadras e visitaders a Trun. Denter quels era ils cusseglers guvernativs Jon Domenic Parolini e Marcus Caduff sco era la candidata per la regenza Carmelia Maissen.

Igl ei stau in sera interessanta, enrihonta ed oravontut divertenta en in'atmosfera lucca ella Bar Da Stefano a Trun. Tema central dalla sera ei la participaziun da giuvenils e da giuvenils carschi en Surselva staus. Sco introducziun el tema han ils biebein 40 participonts saviu tedlar tier a referats cuorts dils treis candidats per la regenza. «Sin plaun communal enconuschel jeu sin fundament da miu engaschi gia entginas pusseivladads co la participaziun sa vegnir promovida. Per quei motiv eis ei stau enrihond d'udir dils cusseglers guvernativs co il cantun pren enta maun temas en connex culla participaziun» di *Samuel Zinsli*, commember dalla cumissiun da giuvenils da Stussavgia e representant dil forum da giuvenils dalla Grappa svizra per las regiuns da muntogna (SAB).

Silsuenter ein ils participonts sco era il publicum vegni integrai ella discussiun. Per survegnir in'investa concreta el tema ein giuvenils persunalitads dalla regiun, las qualas separticipeschan gia activamein ella politica ni ella societad, vegnidas envidadas. *Samuel Zinsli*, *Davide Beer* (president UG Rabius), *Fabio Joos* (commember dalla cumissiun da giuvenils da Stussavgia e representant dil forum da giuvenils dalla SAB) ed *Ivo Capaul* (commember dil parlament communal dad Ilanz/Glion) han rapportau da lur experientschas enteifer lur engaschi politic e social. Ils dus moderators *Fabian Collenberg*, co-president dil Giuven Center Grischun e *Sarina Caduff*, presidenta dil Giuven Center Surselva, han tschentau als giuvenils participonts sco era als candidats per la regenza damondas clarificontas, denton era criticas, per examinar la participaziun politica munglusa en Surselva. Dalla discussiun eis ei seresultau ch'ei dat en mintga cass aunc potenzial per alzar il nivel da participaziun tiels giuvenils en Surselva – seigi quei ella politica, denton era en uniuns. «Sco commember pli giuven el parlament da Glion sun jeu cunscients ch'ei drova mintgaton in tec surmuntada per viver participaziun», manegia Ivo Capaul. La partida dil Giuven Center Surselva ei cunscienta ch'ils obstachels ein per part grond da ughegiar igl'empre pass e surpender responsablada ella politica ed ella societad. Damai che la promoziun da giuvenils ei ina tematica centrala per la partida giuvna regiunala vegn ella sin basa dils resultats dalla discussiun ad empruar d'anflar soluziun adattadas e da promover quellas. (cdm)